

Ha péicha nde che angirũ ko árape jahechami jeýta pe Ñandejárañe'ẽ Génesi kap. 48: 1-7-pe, he'iva, ha jahecháta iporãha ñanemandu'a pe Ñandejára he'ivaekue rehe. / Jahechami aipórõ Gen. Kap. 48: 1-7-pe he'iva, ha péicha he'i... 1) Ko'ã mba'e rire, oje'e Hosepe itúa hasyha. Upémaramo oho oñandúvo chupe ha ogueraha hendive mokõive ita'yra, Efraín ha Manasés. 2) Oikuaávo Hakob Hose ouha, oñeha'ãmbaite ha uguapy hupápe. 3) Hakob he'i Hosepe: Tupã ipu'akapáva ojechaukavaekue chéve táva Luz Kanaanpe guápe, ha che rovasa, 4) ha he'ivaekue chéve: Heta romoñemoñaréta ha opu'ãvarã chuguikuéra heta tetã, ha ame'ẽta ko yvy neñemoñarépe opaiteve árapepeve. 5) Mokõive nde ra'y, Efraín ha Manasés onasévavaekue Egíptope aju mboyve, che mba'e avei, che mba'eháicha Rubén ha Simeón. 6) Nde ra'ykuéra upe riegua katu nemba'eta, ijyvy kuérata avei hyke'yrakuéra Efraín ha Manasés yvy. 7) Ajapo upéicha nde sy Raquel rehehápe. Hetaite ambyasyvaekue omanóramo guare Kanaánpe, namombyrýi Efrátagui, ajukuévo Padan Arángui. Añotývaekue chupe Efrata rapépe, ko'ağa herahápe Belén. // Mbaguasuetema ningo Tupã ome'ẽrehe ñandéve, ñanemandu'akuaa haguã hetamba'e rehe, ikatúgui ñanemandu'a, ikatu heta mba'e jaikuaa, ha jaikuaa avei sapy'ante hasy etereiha ñanemandu'a haguã upe ñanemandu'aséva rehe, ha hetamba'e ñande resaraisévagui katu, ndaikatúi ñande resarái, ha upéichavéramo jepe ja'e: mba'e porã ijojaha'ýva hína Ñandejára ñande apo rehe, ikatu haguãicha heta mba'e rehe ñanemandu'a. / Ha katu, umi mba'e iporãvéva ha tekotevéva ñanemandu'a hína, upe Ñandejárañe'ẽ, pe Ñandejárañe'ẽ ñamoiñgue pypukuvarã ñande rekove ha ñane'angapýpe. Ñanemandu'avarã Ñandejára he'iva rehe, katuete ohehuvarãgui opaite mba'e ha'e he'iva guive. Ha jahecha Hakob itujaite riréna, ndahesaráivaha pe Ñandejára he'ivaekuégui; uguahẽvo ohóvo omano haguãha ára, oñemomandu'a ha omombe'u itáyra Hosépe umi mba'e ha'e tekotevéva oikuaa ha avei ita'yrakuéra tekotevéva oikuaa.

(Sigue en la pág. 2)

Hose oikuaávo itúa hasyetémaha omano haguãicha, oho hendápe ha ogueraha mokõive ita'yra hendive, oñandu haguã itaita guasúpe hikuái. //Jahecha háicha, Hose, oñangareko porã itúa rehe ha avei hyke'ykuéra rehe, ha'e ningo upe mburuvichaguasu Egipto retãme, ha katuete oimévarã hetaiterei hembiaapo, ha upéichavéramo jepe ohóva jepi itúa andúvo. / Hakob oikuaávo ita'yra Hose oúmaha hendápe, ha'e oñembosako'i oha'arõ haguã chupe, ha'e omombe'uta chupe ha ita'yra kuérape Ñandejára he'ivaekue chupe.// Oikévo hendápe Hose mokõive ita'yra reheve, Hakob oñepyrũ omombe'u chupekuéra mba'eichapa Tupã Ñandejára ojechaukávaekue chupe, ha omombe'u chupe mba'epa upe Ñandejára he'ivaekue chupe, okañyramo guare ohóvo hyke'u Esaúgui. Omombe'u oguahẽ hague upe táva luz héravape, ha upe tenda upévape ha'e omoĩ peteĩ téra pyahu, Hakob ombohéra Betel. Ha omombe'u chupe, upépe ojehechauka hague chupe Tupã Ñandejára ha ohovasa hague chupe. / Upépe Hakob ohecha iképegua ha Ñandejára oñembo'y hína ijkére ha ohendu Tupã Ñandejára oñe'ẽramo chupe, ha he'iha chupe: Che hína Tupã, nde ru Abraham ha Isaak Jára. Ame'ëta ndéve ha neñemoñarépe ko yvy repytu'uha reína. Neñemoñare heta etereíta, yvy ra'yi yvy ári guáicha, ha iñasãita opárupi ko yvy jerekuévo. Nde ha neñemoñare rupive ojevovasáta tetã nguéra. Nemandu'ake. Aĩméta nendive, romo'ãta ivaívagui mamo rehojápe, ha rogueru jeýta ko'ape. Nodoroheja mo'ãi rejapopaitépeve ha'evaekue ndéve. /

Upéi Hakob he'i Hosépe, umi mokõi ita'yra, manasés ha Efraínpe ha'e oguerekotaha ita'yra teetévaramo. Umi ita'yra opytáta chupe Hose rekovia. Hose ningo upe Hakob rembireko Rakel memby ypykue, ha Rakel hína upe hambireko ohayhu añetetévaekue, ha omombe'u Hosépe mba'eichapa omano upe isy Belen rapépe, ha Hoségui hína upe ta'yra ypykue upe hambireko ohayhúva membyre, chupe opyta hetaverãva umi mba'e itúa ohejáva, ha péicha Hakob ojapo oguerekóvo ita'yra teetéva apytépe umi Hose ra'y mokõivépe. Chupekuéra opytáta umi Hosépe opytavarãva. Upe ára guive Hose ra'y mokõive Manases ha Efrain opyta Hakob ra'y teetévaramo.

(Sigue en la pág. 3)

Mba'eguasú ikatúva ja'e ningo, Hakob araka'eve ndahesaráiva Tupã Ñandejára ñe'ẽgui, ha'e oguerovia Tupã Ñandejára katúete ojaipotaha he'ivaekue guive. Hakob oguerovia Ñandejára he'iva ojehupavarãha jepémo heta áñoma ohasa ohendu haguã Tupã Ñandejára he'iva chupe, ha ko'aga ituja ha omanombotámaramo jepe, ogueroviente gueteri Tupã Ñandejára okumplívarãha katúete upe ñe'ẽ. Chupe guarã Ñandejárañe'e añeteguá opaiteve árape. Ñande ko ñande árape jaikovéva ha ja'eva avei jajeroiviaha Tupã Ñandejára rehe, ñande ja'eva jajeroiviaha Hesukrísto rehe ñande salvadorha, ha ja'eva avei jagueroiviaha añeteguaha upe Ñandejárañe'ẽ he'iva, heta jeyve, ñande ndajaikuaa porãi mba'eve guasu pe Ñandejárañe'ẽ he'ivagui, ha heta jeyve ñahendu ha jale'eramo jepe, pya'eterei ñande resaráipa.

Ha péicha hína nde che angirũ, iporãitevarã ningo ikatúramo jaheka umi Ñandejára promésa jaguerekóva upe ñe'ẽme, Ha ñañeha'ã tajaikuaa porã, tañamoiñgue pypuku ñanekorasõpýpe, pe Viblia ja'eha ningo hína pe Ñandejárañe'ẽ añeteguáva, péva rupive Ñandejára ojekuaauka ñandéve ha ñande rekombo'e. Ñandejára ñande rovasa haguã, ñamoĩvavarã ñande jerovia upe Tupã Ñandejára Hakob ogueroviáva rehe, ñamoĩvarã ñane'anga ñande rekove ipópe, ha jagueroiviavarã ha'e nañande reja mo'ãiha araka'eve ni mba'evéichavéramo. Tupã Ñandejára ouvaekue ko yvy ári Hesukrísto rupive, ome'ẽ hekove ñande rehehápe, ikatu haguãicha jajeroiviáva guive hese jahupyty perdon ha salvacion, ha hi'aiténte chéve Ñandejára tanderovasa ha teremoĩ ne'anga nde rekove imborayhu kuarahy'ãme.

(Final del programa 1.362)